

08/06/1998

JPA kaji kaedah ringankan beban pelajar

KUANTAN, Ahad - Jabatan Perkhidmatan Awam (JPA) sudah menjalankan kajian berhubung kaedah yang wajar dilakukan bagi meringankan bebanan pelajar luar negara yang mungkin terpaksa membayar semula pinjaman pelajaran yang tinggi berikutan kejatuhan nilai ringgit.

Jika dipersetujui kerajaan, JPA mencadangkan supaya pinjaman pelajaran itu dibayar mengikut kadar tukaran wang asing yang lama tetapi JPA menyerahkan kepada Kabinet bagi menentukan nilai dolar berbanding ringgit yang akan dijadikan asas kiraan itu.

Timbalan Menteri di Jabatan Perdana Menteri (JPM), Datuk Fauzi Abdul Rahman, berkata pelajar di luar negara yang menerima pinjaman pelajaran dalam jumlah yang besar berikutan kejatuhan nilai ringgit, tidak perlu bimbang untuk menjelaskan bayaran balik kerana ia akan dilakukan secara fleksibel.

Beliau berkata, penelitian JPA berhubung perkara berkenaan adalah selaras arahan Perdana Menteri, Datuk Seri Mahathir Mohamad, yang meminta JPA mencari langkah bagi memudahkan pelajar membayar semula pinjaman berganda berkenaan akibat kejatuhan ringgit.

"Kejatuhan nilai ringgit menjadikan kadar pinjaman pelajaran penuntut Malaysia di luar negara bertambah tinggi dan keadaan ini menyebabkan mereka perlu membayar semula pinjaman itu dengan jumlah yang tinggi juga.

"Bagaimanapun, Perdana Menteri meminta JPA mengkaji semula perkara itu dan mencari kaedah yang sesuai bagi meringankan beban pelajar yang terpaksa membayar pinjaman berganda itu.

"Jadi, jika kerajaan bersetuju, JPA mencadangkan pembayaran semula pinjaman dilakukan mengikut kadar tukaran asing yang lama tetapi nilai kiraan itu diserahkan kepada Kabinet memutuskannya," katanya kepada pemberita di sini hari ini.

Pertengahan Mac lalu, Perdana Menteri mengarahkan JPA mengkaji cara membolehkan pelajar tajaannya di luar negara membayar semula pinjaman yang berganda akibat kejatuhan ringgit.

Pelajar tajaan JPA dan Mara dijangka terpaksa membayar pinjaman berganda berikutan kejatuhan ringgit lebih 30 peratus berbanding dolar Amerika dan paun sterling.

Mengulas kes penahanan empat penuntut Malaysia termasuk pelajar tajaan JPA di Britain berhubung isu pengeluaran wang menggunakan nombor kad kredit melalui Internet, beliau berkata, setakat ini, kerajaan belum menerima laporan lengkap mengenai kes itu.

Katanya, JPA tidak akan bertindak terburu-buru, sebaliknya sebarang tindakan hanya dilakukan selepas mendapat maklumat daripada pihak berwajib, khasnya dari Jabatan Penuntut Malaysia (MSD) di London.

(END)